

2018-imut Nunatta Karsiata naatsorsuutaasa akuersissutigineqarnissaannik siunnersuut
(Aningaasaqarnermut Nunanilu Avannarlerni suleqatigiinnermut Naalakkersuisoq)**Akissuteqaat**

(Aningaasaqarnermut Nunanilu Avannarlerni suleqatigiinnermut Naalakkersuisoq)

Aappassaaneerinnineq

Naalakkersuisut sinnerlugit Kukkunersiuinermut Ataatsimiititaliap Nunatta Karsiata 2017-imut naatsorsuutaanut isumaliutissiissutaanut qujassuteqarfigiumavara. Ataatsimiititaliap isumaqatigiittup naatsorsuutit eqqortumik takutitsuunerannik, akuersissutigineqarnissaanillu innersuussinera Naalakkersuisut iluarisimaarlugu maluginiarpaat.

Kukkunersiuinermut Ataatsimiititaliaq – ukiut kingulliit assigalugit – Namminersorlutik Oqartussat naatsorsuuseriviata ingerlaavartumik pitsanngoriartornera pillugu kukkunersuisunit avataaneersunit paasisutissanik pissarsisimanagera Naalakkersuisut iluarisimaarpaat.

Ukiut siuliini kukkunersuisut oqaaseqaateqarfigisaat ataaseq 2018-imi naammassineqarpoq. Tamatuma saniatigut kukkunersuisut oqaaseqarfigisaat allat – suli naammassineqanngitsut - pitsanngoriarfiupput. Ukiuq manna kukkunersuineq kukkunersuisut nutaanik oqaatigisaqarnissaannut pissutissaqartitsinngilaq.

Ilaatigut pisiortorfinnut akiitsut pitsaanerulersimasut Kukkunersiuinermut ataatsimiititaliap paasivaa, taamaattoq pitsanngoriaatip taassuma ERP-mik atortorissaarummik atuutilersitsinermik kinguaattoornermik oqaatigineqartumik qanoq annertugisumik eqqugaanera Naalakkersuisut paasisutissiissutigissagaat qinnutigineqarpoq. ERP-mik atortorissaarutit ilaa nutaaq pisiortorfinnut akiitsunik isumaginnittoq juuni 2019-imi atorneqalersoq, taamaammallu oqaatigineqartutut oqimaqatigiissitsinermik sulineq 2020-mi pitsanngoriassasoq Naalakkersuisut paasisutissiissutigissavaat.

Pitsanngoriaatit allat ataatsimiititaliap iluarinartitai ilaatigut tassaapput akiligassanik nussuinerit kingusinnerusukkullu naatsorsuutitut inissiinerit siusinnerusumut sanilliullugu annikillisinneqarsimanagerat, tamannalu atuinermik isertitanillu ingerlaavartumik naatsorsuutitigut naatsorsuinerup pitsaassusaannik qaffatsitsineruvoq, taamaattoqarneratalu aammaarluni Namminersorlutik Oqartussani ingerlaavartumik pitsaasumik missingersuutit malittarinninnermut ikorfartuutaavoq.

Kukkunersiuinermut Ataatsimiititaliaq ataatsimiititaliap apeqqutaasa akineqarnerinik aaqqissuussaalluarnerannik misiginera, taamaattoq Naalakkersuisut pisuni ataasiakkaani ataatsimiititaliap apeqqutaanik akissutitut piffissaliussanik eqqortitsiniapiloortartut Naalakkersuisut

maluginiarpaat. Taamaammat Ataatsimiititaliap apeqqutaanut akissutit piffissaq eqqorlugu suliarineqartarnerisa pitsanngorsartuarnissaat Naalakkersuisut nangittumik aallukkumavaat. Pissutsit tikkuaavigineqartut qaqugukkut suliarineqarlutik aaqqinneqarnissaannut erseqqissumik aaqqissugaanerumillu tungavilersukkamik paasisitsisarnissaq, taamaalillunilu apeqquteqaqqittarnerit pinngitsoortinneqarnissaat Kukkunersiuinermut Ataatsimiititaliap maqaasigaa Naalakkersuisut maluginiarpaat. Suli pitsanngorsaanissamut periarfissaqartoq Naalakkersuisut isumaqatigaat. Kukkunersiuinermi oqaaseqarfigineqartut arlallit, Namminersorlutik Oqartussat aningaasaqarnermut atortorissaarutaasa arlallit maanna atorneqartut ullutsinnut naleqqutinnginnerannik patsiseqarput. Pisortat ataatsimoortumik aningaasaqarnikkut atortorissaarutaannik ERP-mik ingerlaavartumik atulersitsineq, kiisalu pisortat ataatsimoorussamik kontunut pilersaarutaat nutaaq, Ataatsimiititaliap Naalakkersuisullu kissaatigisaattut pitsaassutsimik qaffassaanermut iluaqutaassasoq naatsorsuutigineqarpoq.

Tassungali atatillugu pisortat ingerlatsivianni tamarmiusumi pisortat ataatsimoorussamik aningaasarnikkut atortorissaarutaannik nutaamik atulersitsinerup, peqatigisaanillu ingerlaavartumik ingerlatsinerup saniatigut suliarineqarnera piffissartornartuullunilu isumalluutunik annertuumik atuiffiusumik suliassaanera, Naalakkersuisut tassungu tunngatillugu ilanngullugu erseqqissarumavaat. Atortorissaarutip atorneqalernerata nassatarisaanik pitsanngorsaaneq ingerlaavartumik pissaq, tamannalu suleriaatsit nutaat periutsillu ingerlatsivinni, taamatullu minnerunngitsumik sulisunit atulernerqarnerat ingiaqatigalugu pissaq.

Taamattaq Kukkunersiuinermut Ataatsimiititaliap isumaliutissiisummini aamma inassuteqaatinik arlalinnik saqqummiussivoq. Inassuteqaatit tamakkerlugit akissuteqaammi uani oqaaseqarfigisinnaanngilaat, taamaattoq ataasiakkaat Naalakkersuisut akissuteqarfigiumavaat.

Missingersuutunik eqqortitsinnginnermik nassuiaatinik suliaqartarnerit pillugit maleruagassat immikkoortunut erseqqissarneqarnissaat Kukkunersiuinermut Ataatsimiititaliap inassutigaa. Immikkoortoq tamanna pitsanngorsarneqartariaqartoq, kiisalu ataatsimiititaliap siunnersuutigisaatut maleruagassat erseqqissaassutigineqarnissaat Naalakkersuisut isumaqatigaat.

Akissarsiani atorfinitsitsisarnernilu maleruagassanik isumaginninnerni annertuumik kukkunernik nassaartoqanngitsoq Ataatsimiititaliap maluginiarpaat. Taamaattoq atorfinitsitsinerit ilaanni atorfinitsitaanermut isumaqatigiissutip piffissaq eqqorlugu utertinneqartanninnerannik suli nalaataqartoqartarpoq Taamaammat Tamanna iliuuseqarfigineqassasoq Kukkunersiuinermut Ataatsimiititaliap inassutigaa. Ataatsimiititaliap siunnersuutigisaatut Naalakkersuisut tamanna iliuuseqarfigissavaat.

Aningaasaqarnermut Sulisoqarnermullu Aqutsisoqarfimmi pisiortortarnermi immikkoortortami ilaatigut pisiortortarnermi isumaqatigiissuteqartarnermi periarfissat misissoqqissaarneqartarnerat Nunatta Karsiata Kukkunersiuisuata erseqqissaatigaa. Pineqartumi iluaqutigineqanngitsunik

periarfissaqarluartoq Nunatta Karsiata Kukkunersiuisuisa nalilerpaat. Tamanna tunuliaqutaralugu Naalakkersuisut periarfissanik atorluarneqanngitsunik taakkuninnga atorluaanerunissaat Kukkunersiuinermut Ataatsimiititaliap kaammattuutigaa. Naalakkersuisut suleriaqqinnerminni isummersuutit taakku ilanngukkumavaat.

Namminersorlutik Oqartussani siunnersortinik atuneq pillugu naatsorsuutininik nassuiaasersukkanik Siunissami Nunatta Karsiata naatsorsuutaanut nalunaaruteqartarnermut aalajangersimasumik ilanngussisarnissaq siunertaralugu suliniutinik pisariaqartunik Naalakkersuisut aallartitsinissaat Ataatsimiititaliap inassutigaa. Oktober 2019-imi pisortat ataatsimoorussamik kontunut pilersaaruteqalernerat immikkoortut naatsorsuusiornermik ingerlatsisut siunnersortinik assigiinngitsunik atuinermik nalunaarsuinissamut pitsaaneruseqarsumik periarfissiivoq. Taamaalilluni ukioq naatsorsuusiorfiusoq 2020 tassaassaaq ukioq ilivitsaq siullesq taamatut immikkoortiterinissamik periarfissiisoq. Taamaaliorneq siunissami Ataatsimiititaliap kissaataamik naammassinnissasoq Naalakkersuisut neriuutigaa.

Naggataagut 2019-imut Nunatta Karsiata Naatsorsuutai kukkunersiuisunit Deloittemik kukkunersiorneqarnissaat Ataatsimiititaliap inassutigaa. Naalakkersuisut tamanna isumaqatigaat.

Naggasiullugu Kukkunersiuinermut Ataatsimiititaliap isumaliutissiisummik annertuumik suliaqarsimaneranut qujassuteqarfigissavara.

Taama oqaaseqarlunga suliaq Inatsisartunut inaarutaasumik aappassaaniigassanngortippara.